

- केन्द्रीय वित्त मंत्री निर्मला सीतारमण कानी ऊं आज पेश करी ज्या आम बजट मांय खेती-बाड़ी, स्वास्थ्य, भणाई-लिखाई, कपड़ा अर सैर-सपाटा समेत न्यारा-न्यारा हलकां माथे खास जोर।
- इन्कम टेक्स री रेट मांय कोई बदलाव नी करी ज्यो-तीन नुवा अखिल भारतीय आयुर्वेद संस्थान खोल्या जावेला।
- प्रधानमंत्री कह्यो- केंद्रीय बजट मेक इन इंडिया अर आत्मनिर्भर भारत ने नुवी गति देवेला।
- मुख्यमंत्री भजन लाल शर्मा कह्यो- बजट सबका-साथ सबका विकास माथे केन्द्रित-विपक्ष बजट ने नाउम्मीद करण वाळो बतायो।
- जैसलमेर मांय चाल रह्यो मरु महोत्सव आज पूरो व्हे रह्यो है-खुहडी रा धोरां बीचे सांस्कृतिक संध्या मांय शामिल व्हेवण सारु मोटी तादाद मांय देशी-परदेसी सैलाणी पूग्या।

0000

वित्त मंत्री निर्मला सीतारमण आज लोकसभा मांय माली साल 2026-27 रो आम बजट पेश कीनो। ओ वां रो रिकॉर्ड नौवों बजट हो। आज पेश करी ज्या बजट मांय खास तौर ऊं क्षमता निर्माण अर सुधारां माथे ध्यान दियो ज्यो है। वित्त मंत्री छह हलकां मांय नुवी पहल रो प्रस्ताव कीनो। आं मांय औद्योगिक हलकां री काया पलट करणो, एमएसएमई उद्यम तैयार करण, बुनियादी ढांचा ने मजबूत बणावणो, लम्बा बगत सारु ऊर्जा सुरक्षा अर स्थायित्व तैय करणो अर शहरी आर्थिक क्षेत्र विकसित करणो शामिल है। वित्त मंत्री भारत ने वैश्विक जैव-औषध विनिर्माण केन्द्र रा तौर ऊं विकसित करण सारु आवता पांच साल मांय दस हजार करोड़ रुपया रा खर्च रो प्रस्ताव कीनो। वित्तमंत्री सेमीकंडक्टर मिशन 2.0 सुरु करण रो ऐलाण कीनो। वित्त मंत्री कह्यो के लारला साल 22 हजार नौ सौ 19 करोड़ रुपया रा खर्च ऊं सुरु करी ज्यी इलेक्ट्रॉनिकी घटक विनिर्माण योजना सारु पैली ई लक्ष्य ऊं दूणा निवेश री प्रतिबद्धता मिल चुकी है। वे ई योजना रो खर्चो बधा र चालीस हजार करोड़ रुपया करण रो प्रस्ताव कीनो। वित्त मंत्री कपड़ा हलका सारु एकीकृत कार्यक्रम रो प्रस्ताव कीनो। इण मांय रेशम, ऊन अर जूट सरीखा कुदरती अर कारखाना मांय बणायी ज्या रेशा अर नुवा रेशा बणावण रा हलका मांय खुद रे पाण ऊबो व्हेवण सारु राष्ट्रीय फाइबर योजना, पूंजीगत मदद ऊं पारम्परिक क्लस्टरों ने और बेहतर बणावण अर शैक्षणिक संस्थानों री मदद ऊं वस्त्र कौशल परिवेश ने और चोखो बणावण सारु समर्थ कार्यक्रम रा दूजा दौर रो प्रस्ताव शामिल है। ई सागे ई मेगा टेक्सटाइल पार्क खोलण अर खादी, हथकरघा अर हाथ री कारीगरी ऊं सामान बणावण वाळां री मजबूती सारु महात्मा गांधी ग्राम स्वराज योजना री सुरुआत रो प्रस्ताव कीनो। एम.एस.एम.ई. ने विकास रो खास इंजिन बताता थकां वित्त मंत्री आं ने विकसित करण सारु इक्विटी, नकदी अर पेशेवर सहायता रो प्रस्ताव कीनो। वित्त मंत्री आं उद्यमां ने बधावो देवण सारु दस हजार करोड़ रुपया री लघु, मध्यम उद्यम विकास निधि सुरु करण रो प्रस्ताव कीनो। वित्त मंत्री कह्यो के पांच लाख ऊं बत्ती आबादी वाळा सैकिण्ड अर थर्ड कैटेगरी रा शहरां मांय बुनियादी ढांचा विकास माथे खास जोर दियो जावेला। वे कह्यो के सार्वजनिक पूंजी खर्च माली साल 2014-15 मांय दो लाख करोड़ रुपया ऊं बध र लारला माली साल ताई 11 लाख करोड़ रुपया ऊं बत्तो व्हे ग्यो है।

वित्त मंत्री आज पेश करी ज्या बजट मांय ई आवंटन ने बधा र 12 लाख 20 हजार करोड़ रुपया करण रो प्रस्ताव कीनो। बुनियादी ढांचा विकास अर निर्माण चरण रे दौरान जोखिम रा प्रति गैर-सरकारी डेवलपर्स रो भरोसो बधावण सारु वित्त मंत्री बुनियादी ढांचा जोखिम

गारंटी निधि बणावण रो प्रस्ताव कीनो। सैर-सपाटा ने बधावो देवण अर आखिरी छोर अर दूर-दराज रा हलकां ने जोड़बा सारु वित्त मंत्री समुद्रीय विमान देश मांय बणावण बाबत् समुद्री विमान-वी जी एफ योजना सरु करण रो ऐलाण कीनो। पर्यावरण अनुकूल यात्रा ने बधावो देवण सारु बजट मांय सात तेज गति रा रेल कॉरीडोर विकसित करण रो प्रस्ताव करी ज्यो है। वित्त मंत्री कह्यो के सरकार आर्टिफिशियल इंटेलिजेंस मिशन, राष्ट्रीय क्वांटम मिशन, राष्ट्रीय अनुसंधान कोष अर अनुसंधान विकास अर नवाचार निधि रे जरिए नुवी प्रौद्योगिकी री मदद ऊं केई जतन कीना है। इण मांय किसानां, महिलावां, नौजवानां अर दिव्यांगजन सारु खास मौका मिलेला। वित्त मंत्री कह्यो के दस साल ऊं चाल रही कोशिश ऊं करीब 25 करोड़ लोग न्यारा-न्यारा लेवल माथे गरीबी ऊं ऊंचा उठ्या है। खेलो इंडिया कार्यक्रम रे जरिए खेल-कूद प्रतिभावां रा विकास री कोशिश ने जारी राखता थकां वित्त मंत्री आवता दस साल मांय खेलकूद हलका मांय बदलाव सारु खेलो इंडिया मिशन चलावण रो प्रस्ताव कीनो।

बजट मांय इन्कम टैक्स स्लेब मांय कोई बदलाव रो प्रस्ताव नी करी ज्यो। इन्कम टैक्स री संशोधित रिटर्न या मोड़ी रिटर्न दाखिल करण री मियाद बधावण रो प्रस्ताव है। संशोधित रिटर्न दाखिल कर वर्ष पाछे 31 मार्च ताई दाखिल करी जा सकेला। सरकार डिडिडेण्ड अर म्यूचुअल फंड ऊं व्हेवण वाळी आमदनी माथे ब्याज कटौती हटावण रो ऐलाण कीनो। ई सागे ई वायदा बाजार रा फ्यूचर्स माथे एसटीटी शून्य दशमलव दो फीसदी ऊं बधा र आधा फीसदी करण रो प्रस्ताव करी ज्यो।

बजट भाषण पाछे खबरनवीसां सागे बातचीत करता थकां वित्त मंत्री कह्यो के ई बजट रे जरिए भारत खास तौर ऊं संरचनात्मक सुधारां सागे मजबूत अर टिकाऊ आर्थिक पारिस्थितिकी तंत्र बणावण माथे ध्यान दियो ज्यो है, जो आगे ई चालतो रेहवेला।

0000

प्रधानमंत्री नरेंद्र मोदी बजट री सराहवणा करता थकां कह्यो के केंद्रीय बजट मेक इन इंडिया अर खुद रे पाण ऊबा भारत ने नुवी गति देवण सारु खास गेलो बतावे है। एक वीडियो संदेश मांय श्री मोदी कह्यो के ई साल रो बजट भारत मांय बदलाव ने नुवी ताकत अर गति देवेला।

श्री मोदी कह्यो के ओ बजट देश रा भला रो है अर इण मांय देश रा विकास ने नई ऊर्जा मिलेला। वे कह्यो के ई बजट मांय नौजवानां सारु खास प्रावधान करी ज्या है।

0000

केंद्रीय मंत्री अश्विनी वैष्णव कह्यो के बजट मांय इलेक्ट्रॉनिक्स अर सेमीकंडक्टर बणावण समेत बणायी-चुणायी रा हलका ओड़ी खास ध्यान दियो ज्यो है। वे कह्यो के बजट मांय देश मांय सामान बणावण माथे खास ध्यान दियो ज्यो है। श्री वैष्णव कह्यो के आवता बगत मांय डाटा सेंटर्स देश री मोटी ताकत बणेला।

0000

बजट रा बारा मांय प्रदेश मांय ई सकारात्मक प्रतिक्रिया मिली है। मुख्यमंत्री भजन लाल शर्मा केंद्रीय बजट ने नौजवानां, महिलावां, किसानां, वंचित, गरीब अर आम आदमी रो बजट बतायो। वे कह्यो के ओ बजट तेज माली विकास, जनता री उम्मीदां माथे खरो उतरण अर सबका साथ सबका विकास रा तीन कर्तव्यां ने समर्पित है। वे कह्यो के ओ बजट राजस्थान ने विकास री मुख्यधारा मांय और मजबूती ऊं जोड़बा रो काम कीनो है। मुख्यमंत्री कह्यो के बजट मांय 40 हजार करोड़ रुपया रा खर्च वाळा इंडिया सेमीकंडक्टर मिशन 2.0 सरु करण रा ऐलाण ऊं राजस्थान ने ई फायदो मिलेला।

0000

केंद्रीय संस्कृति अर पर्यटन मंत्री गजेंद्र सिंह शेखावत बजट री सराहवणा करता थकां इण ने सैर-सपाटा अर संस्कृति हलका सारु क्रांतिकारी बतायो। श्री शेखावत कह्यो के ओ बजट उम्मीदां ऊं बत्तो चोखो है। भाजपा रा प्रदेश अध्यक्ष मदन राठौड़ कह्यो के ओ बजट देश ने खुद रे पाण ऊबो करण, मजबूत बणावण अर दुनिया रो अगाड़ी देश बणावण ओड़ी ऐतिहासिक कदम है। भाजपा रा आला नेता डॉ. सतीश पूनियां अर राजेंद्र राठौड़

बजट ने सगळों रो ध्यान राखण वाळो बताता थकां कह्यो के ओ देश रा विकास ने और तेज करेला। दूजी कानी काँग्रेस पार्टी बजट ने नाउम्मीद करण वाळो बतायो। राज्य रा पैली वाळा मुख्यमंत्री अशोक गहलोत कह्यो के बजट मांय राजस्थान रो जिक कठे ई नी व्हेवणो निराश करण वाळो है। वे कह्यो के बजट मांय गरीब, मजूर अर असंगठित हलका री मोटी आबादी सारु कोई राहत रो ऐलाण नी करी ज्यो।

0000

मुख्यमंत्री भजनलाल शर्मा कह्यो के संवारे बेगा उठ र दौड़बा अर कसरत करबा ऊं शरीर स्वस्थ्य रहेवे है। वे जयपुर मांय राख्यी ज्यी एयू जयपुर मैराथन मांय बोल रह्या हा।

0000

जैसलमेर मांय चाल रह्यो मरु महोत्सव आज पूरो व्हे रह्यो है। इण रे समापन रे मौके खुहडी रा धोरां बीचे रंगारंग सांस्कृतिक संध्या “द फोक ऑर्केस्ट्रा ऑफ राजस्थान” राख्यी जा रही है। इण मांय मोटी तादाद मांय देसी—परदेसी सैलाणी अर वठे रा लोग भाग ले रह्या है।

0000